

吳興藝文補卷之十九目錄

周必大

新除敷文閣直學士知潭州劉岑改除敷文閣待  
制依舊官觀制

龍圖閣直學士左朝奉大夫提舉江州太平興國  
宮周操除太子詹事制 周操歸安人

安德軍節度使開府儀同三司充萬壽觀使天水

郡開國公食邑三千一百戶食實封八百戶趙

伯圭加食邑七百戶食實封三百戶制

趙伯圭  
見前

昭慶軍節度使致仕武功郡開國公食邑三千三百戶劉懋加食邑二百戶制

昭慶軍節度使致仕武功郡開國公劉懋加食邑五百戶制

又昭慶軍節度使致仕武功郡開國公劉懋加食邑五百戶制

又昭慶軍節度使致仕武功郡開國公劉懋加食邑五百戶制

昭慶軍節度使知荆南軍府事楊俊進封和義郡

開國公加食邑五百戶制

賜顯謨閣直學士左朝議大夫知潭州沈介乞守

本官職致仕不允詔

沈介見前

賜顯謨閣學士左中奉大夫知潭州沈介辭免召

赴行在乞改除二官觀差遣不允詔

賜徽猷閣直學士左朝請郎知太平州周操辭免

改差知泉州恩命乞改除一官觀不允詔

賜徽猷閣直學士左朝奉大夫周操再辭免知泉

州及奏事恩命乞改除一官觀差遣不允詔

賜徽猷閣直學士左朝奉大夫新改差知泉州事

周乞除改宮觀差遣不允詔

賜徽猷閣直學士左朝奉大夫提舉江州太平興

國宮周操辭免除龍圖閣直學士恩命不允詔

賜龍圖閣直學士左朝奉大夫提舉江州太平興

國宮周操辭免召赴行在不允詔

賜簽書樞密院事李彥穎辭免除叅知政事恩命

不允詔

賜叅知政事李彥穎辭免書撰冊文轉一官不允

詔

賜叅知政事李彥穎上表辭免撰冊文轉一官恩  
命不允詔

賜李彥穎辭免差權提舉國史院實錄院編修國  
朝會要不允詔

賜通議大夫叅知政事李彥穎乞解罷機政不允  
詔

賜通議大夫叅知政事李彥穎上表再乞解罷機  
政不允不得再有陳請詔

賜通議大夫叅知政事李彥穎乞解罷機政改除

一在外官觀不詔

賜通議大夫李彥穎辭免除資政殿學士知紹興府恩命不允詔

賜李彥穎再辭免除資政學士知紹興府恩命不允不得再有陳請詔

賜資政殿大學士中大夫沈復辭免知鎮江府恩

命乞除一在外官觀差遣不允詔

沈復德清人

賜資政殿大學士中大夫知鎮江軍府事沈復乞

除一在外宮觀差遣不允詔

賜資政殿大學士中大夫知福州軍州事充福建

路安撫使沈復乞除一在外宮觀差遣不允詔

賜朝請大夫權尚書刑部侍郎兼侍講兼權給事

中程大昌辭免除刑部侍郎恩命不允詔

賜朝請大夫試尚書刑部侍郎兼侍講程大昌乞

特除一小郡或在外宮觀差遣不允詔

賜朝請大夫試尚書吏部侍郎兼侍講程大昌辭

免兼同修國史恩命不允詔

賜朝議大夫試尚書吏部侍郎兼侍講兼同修國  
史兼權吏部尚書程大昌乞在外宮觀差遣或  
小郡不允詔

賜朝議大夫新除權吏部尚書兼侍講兼同修國  
史程大昌辭免國史日曆所經修不經進官特  
轉一官恩命不允詔

賜敷文閣直學士右承議郎知明州兼沿海制置  
使趙伯圭乞除一在外宮觀差遣不允詔

賜趙伯圭上表再辭免除開府儀同三司充壽



觀使進封天水郡開國公加食邑食實封恩命  
不允不得再有陳請詔

賜趙伯圭上表再辭免除安德軍節度使提舉隆  
興府王隆萬壽宮任便居住加食邑食實封恩  
命不允不得再有陳請詔

賜中奉大夫蔡洸辭免除徽猷閣學士與郡恩命  
不允詔

蔡洸寓公

賜徽猷閣學士中奉大夫知寧國軍府事蔡洸乞  
除一宮觀差遣不允詔

賜降授大夫權吏部尚書兼詳定一司勅令蔡洸

辭免經修進吏部七司法轉一官恩命不允詔

賜昭慶軍承宣使提舉佑神觀士欽辭免除保康

軍節度使依前提舉佑神觀恩命不允詔

賜左朝散郎試中書舍人兼侍講兼直學士院鄭

聞辭免新除禮部侍郎依舊兼直學士院恩命

不允詔 鄭聞謫公

賜朝議大夫試吏部尚書韓元吉乞授一州郡不

允詔 韓元吉謫公

賜中奉大夫試吏部尚書韓元吉乞畀一州郡不  
允詔

賜中奉大夫韓元吉辭免除龍圖閣學士恩命不  
允詔

賜昭慶軍節度使致仕劉懋辭加食邑食實封不  
允詔

賜昭慶軍節度使知荆南軍府事充荆湖北路安  
撫使楊倓乞異祠祿不允詔

賜昭慶軍節度使知太平州軍州事楊倓乞除一

在外官觀差遣不允詔

賜昭慶軍節度使知太平州軍州事楊俛辭免知  
隆興府恩命乞檢會前奏除一在外官觀差遣  
不允詔

賜昭慶軍節度使知太平州軍州事楊俛上表辭  
免知隆興府恩命不允不得再有陳請詔

獎諭昭慶軍節度使知太平州楊俛詔

賜簽書樞密院事李彥穎上表再辭免除叅知政  
事恩命不允仍斷來章批荅

賜叅知政事李彥穎上表再辭免進書禮儀使特  
轉兩官依例加恩恩命不允仍斷來章批荅

賜李彥穎辭免除叅知政事不允仍斷來章批荅  
賜李彥穎再辭免進書轉官不允仍斷來章批荅  
賜昭慶軍節度使致仕劉懋再上表辭免加食邑  
食實封不允仍斷來章批荅

賜叅知政事李彥穎生日詔

賜叅知政事李彥穎生日詔

賜叅政李彥穎生日詔

賜前執政知鎮江府沈復銀合臈藥勅書

撫問賀金國正旦使副莫濛孫顯祖到闕并賜銀

合茶藥

莫濛君陳曾孫

賜知太平州楊倓福建路安撫使沈復銀合臈藥

勅書

賜趙伯圭除節度使告

賜趙伯圭除開府儀同三司告

乞序位李彥頴下劄子

第二劄子

芮氏家藏集序

芮煒

沈氏論語解序

沈文煇郡人

劉諫議諫藁序

劉度見前

題干祿書

題東坡與佛印元師二帖

為道場僧彥岑題

跋湖州沈壽罔之祖墓誌銘後

跋劉季高與溧陽筆工顧網帖

跋李次山雲溪漁社圖

為萬公李結

題沈傅師碑

題俞洪所藏滕元發與俞退翁詩俞退翁名尚侯之祖

與葛楚輔樞密書二首楚輔名邨

與程泰之侍郎書三首

與周元持侍御書元持名操

答江陰李教授沐書李沐彥穎子

與程倅準書程準大昌子

答沈編修瀛書沈瀛歸安人

答胡湖州南逢書

賀沈相該啓



謝吏部沈侍郎介啓

賀閩中提舉周郎中操啓

上沈丞相啓

賀揚州劉安撫岑啓

賀沈正言濬啓 沈濬見前

答平江沈侍郎介啓

除左使答湖州陳阜卿啓 阜卿名之茂

回福州帥賈侍郎選啓 賈選安宅子

問候葛侍郎啓

宋故龍圖閣學士宣奉大夫致仕新安郡開國公  
食邑二千一百戶食實封一百戶贈特進程公

大昌  
神道碑

朝奉大夫致仕李君迎墓表 李迎寓公結之父

祭芮國噐祭酒文

祭劉汝一 度 諫議文

祭莫子齊舍人文 子齊名濟君陳曾孫冲之見

祭同年程泰之尚書文

吳興藝文補卷之十九目錄終

英典藝文補卷之十九

烏程趙斯張遐周彙編

閔元衢康侯叅輯

韓千秋聖開增定

新除敷文閣直學士知潭州劉岑改除敷文閣待

制依舊官觀制

周必大

物昔祖宗之待近臣也一肯豈嘗遂廢白首獨拜州焉  
一風至於今是賴肆予寡昧欣慕前烈舊人無幾  
我尚有之具官某稟邁往之資忘泛愛之累紹興初載  
已躋高華流落雖久精白未減故加峻職起殿大邦朕

則曰惟爾之能人則曰惟爾不任聽言念舊思酌厥中  
次對奉祠併爲爾寵惟古之忠臣不忘君於猷猷况通  
籍西清者乎何必牧民乃能報國可

龍圖閣直學士左朝奉大夫提舉江州太平興國

宮周操除太子詹事制

周必大

勅東宮設官雖衆而保傅賓客常虛位不置屬惟端尹  
爲之長職閒無事異時率以近臣兼之今吾子好賢重  
士允迺三善何惜備官助其進德哉具官某履道醇固  
持論英亮拾遺執憲風采凜然典銓治民於實交著俾

踐厥次莫如汝宜夫不勞爾以有司之煩將專責爾以  
輔翊之實濕文恭敬固曰夙成正事正言亦由日告茲  
維遴選可不茂哉可

安德軍節度使開府儀同三司充萬壽觀使天水  
郡開國公食邑三千一百戶食實封八百戶趙  
伯圭加食邑七百戶食實封三百戶制

周必大

門下朕荷高厚顧臨之久念祖宗開創之艱稽世室之  
前規講季秋之大報酌以玉爵質固異於陶匏敷以純

禮亦殊於蒲韎旣情文之具舉宜幽顯之來歆眷念  
宗盟分頒祭澤具官趙伯圭襟靈粹遠識量寬洪璧琮  
溫潤以無瑕鍾呂鏗鏘而有度鎮臨近輔昔高牧御之  
才願燕殊庭今嗜詩書之樂適拜熙成之况思形廣愛  
之風越增衍於土田示登昭於物采於戲周邦助祭故  
無同姓之皆來漢室侍祠亦有列侯之不至必親以朕  
臚之賜庸粲夫骨肉之恩永孚於休毋替朕命可

昭慶軍節度使致仕武功郡開國公食邑三千三

百戶劉懋加食邑二百戶制

周必大

門下王者父天母地所以致乎精裡聖人左戚右賢所以與乎廉遜朕躬展陽圖之盛禮眷懷妃族之老臣雖不預於駿奔乃特加於賚予告爾多士揚其高風具官某操行安和性資謙恭知膏梁之期修慕寒素以好修是生邦媛之良早被親庭之眷嘉恭勤之有自方虞待以無窮朕歷覽漢朝最賢班况因婕妤之預選解越騎以告歸家累千金慶傳三子維爾希蹤於前哲亦能謝事於明時節雖上於高牙門自施於行馬享功成身退之樂無漏盡夜行之譏茲緣祭澤之頒恩示臣工之勸

聘其家食衍以圭租於戲行役而乘安車靡貴執膳之  
禮慶賀而親異姓尚均賜胙之休庶無後艱末貞終可

昭慶軍節度使致仕武功郡開國公劉懋加食邑

五百戶制

周必大

門下大德必得其壽實天人相與之符貴老爲近於親  
亦今昔共由之道朕履至尊之寶位慶太上之脩齡發  
開廣朝沛恩諸夏乃眷里居之舊置爲妃族之英宜敷  
詔音用錫爾祉具官劉懋忠尚清逸性資靖莊早參戚  
曉之聯浸涉戎班之貴方華轂朱輪之駑起赤松黃石



之恩雖十五年無印組之縻寧居寵利然千萬歲上官  
庭之壽實預榮懷是因慶澤之施特衍邑租之入於戲  
四代同歸於尚齒未始遺年二踈樂於賜金是能知  
止往服旌嘉之命永爲耆艾之光可

昭慶軍節度使致仕武功郡開國公劉懋加食邑

五百戶制

周必大

門下祀神所以報本貴老所以廣恩唐漢以還饗帝必  
嚴於烈祖商周而上省方先見於高年茲竣事於堂筵  
肆均釐於耆舊具官劉懋受才庸敏毓性寬和聯戚里

之光榮被慈皇之眷簡清風雅志久懷洪景之衣冠黃  
髮秀眉幾類武公之年數安車甚適舊節故存雖莫預  
於奉璋顧豈忘於賜胙戶封彌廣圭食加多用侈閔休  
且綬遐福於戲祭統之倫有十蓋辨親踈達尊之道有  
三亦先爵齒欽承餽惠永保期頤可

昭慶軍節度使致仕武功郡開國公劉懋加食邑

五百戶制

周必大

門下周祀禮年共杖曳於耆老漢儀篤舊致廟胙於太  
常眷言妃族之英久著里居之譽厥有鴻霈於昭令猷

具官劉懋溫恭秉彝冲約成性辰彼碩女輔陰教於慈  
庭賢哉大夫保陽休於暮齒一享安車之逸四膺惠術  
之施茲駕竹宮載修柴燎克禋克祀徧方望之群神如  
式如幾秩邦家之多祐申襄貴戚增衍本封於戲俾爾  
壽域荒土田於徐宅以侯耄老加勞賜於葵丘欽承優  
異之恩永保康寧之福可

昭慶軍節度使知荆南軍府事楊倓進封和義郡  
開國公加食邑五百戶制

周必大

門下朕怡奉親歡懋隆孝治問在朝問在野固莫測於

堯仁得其壽得其名當力揚於舜善乃展日時之吉具  
陳儀物之多旣鏤牒以增休美之稱又奉觴以篤延長  
之慶眷言藩服嘗侍籌帷雖阻預於班庭顧可稽於詔  
爵具官楊倏恭勤自勵明敏推優文昌叅喉舌之聯右  
府效股肱之力追惟乃父夙簡慈衷有如嗣子之才寢  
歷周行之選聞修慶典諒感隆知殿邦雖異於滯南存  
闕寧志於拱北用賜諸公之履仍加多邑之腴於戲稀  
闕盛儀是謂萬歲一純之遇便蕃異數足爲五侯九伯  
之光尚祇若於恩言益勉圖於忠報可

賜與漢閣直學士左朝議大夫知潭州沈介乞守

本官職致仕不允詔

周必大

卿以剛毅之資通明之畧鎮臨一道威望隱然當今謀  
帥未有能越卿者也胡爲引疾遂致爲臣年至耶力不  
足耶卿何謂之切去之果也夫畢滌重膺江南之常獨  
長沙乎其思蓄精神宣底滯靖其介職何恙不已爾庸  
既茂方且圖之所請宜不允

賜與漢閣學士左中奉大夫知潭州沈介辭免召

赴行在乞改除一官觀差遣不允詔

周必大

卿清明敏達輔之學術蓋國家之寶臣也往者藉其才  
付以方面今者閔其勞命之來朝朕待臣工亦云至矣  
卿久去侍從獨不思奉三年之計且告我以嘉謀嘉猷  
乎抗章辭行非不俟駕之義也佇前朕席宜疾爾驅所  
請宜不允

賜徽猷閣直學士左朝請郎知太平州周操辭免  
改差知泉州恩命乞改除一官觀不允詔

周必大

公忠端亮久簡朕心豈弟廉勤數騰郡最以明而敏  
改鎮大藩既答民庸且彰異眷引年罷守本抑常材若  
夫政績著聞風猷克壯則雖度僚有不得任其去者况  
吾法從之儁老哉卿其勿疑亟服新命

賜徽猷閣直學士左朝奉大夫周操再辭免知泉  
州及奏事恩命乞改除一官觀差遣不允詔

周必大

卿以侍從之良而名在諸侯之選易州趣覲蓋將聞嘉  
猷詢民瘼也而卿前既引年今復辭疾殆異乎體國之

誼矣其重賜璽書以著予意匪常禮也朕於卿簡眷如此卿得不爲朕一行乎

賜徽猷閣直學士左朝奉大夫新改差知泉州事周操乞除改宮觀差遣不允詔 周必大

朕惟泉南大藩遠在閩徼遴擇師帥莫如卿宜而懇避之章一再不已昔卿未至引疾可也今旣見朕矣精力之強不異曩時其可遂卿雅志乎勉爲朕行毋數勤詔

賜徽猷閣直學士左朝奉大夫提舉江州太平興



國官周操辭免除罷圖閣直學士恩命不允詔

周必大

卿剛毅簡廉宣慈明敏立朝著不欺之節治郡推愛人  
之心甫鎮清源遽移霜露之疾重以民事撓吾耆老進  
職四等傳爲奉祠之光祇服異恩毋煩冲避

賜罷圖閣直學士左朝奉大夫提舉江州太平興

國官周操辭免召赴行在不允詔 周必大

卿作德日休未嘗載僞故立朝則朕信之典郡則民安  
之蓋簪橐之耆英措紳之令望也往聞嬰疾聽解郡章

今既病瘳可造於朝是以有賜環之命惟古之良臣乃  
心罔不在王室雖千里不以爲遠而况崇朝之近一藁  
再枕乃欲辭行乎所請宜不允

賜簽書樞密院事李彥穎辭免除叅知政事恩命  
不允詔

周必大

朕勵志萬微倚成四輔儀圖俊傑對司文武之權迭運  
樞鈞稽合祖宗之制政路無曠朝廷自尊卿學富詞雄  
體莊志裕恂恂守道耻求世俗之虛名臺臺告猷思護  
國家之元氣朕選於衆而知其可用斷於心而任之不

爰自亮采於幾庭，宣勞於旬歲，運籌合意，具乎帷幄之謀，當軸處中，宜贊廟堂之治。在旋觀而已，審奚固避之能回，所辭宜不允。

賜叅知政事李彥穎辭免書撰冊文轉一官不允

詔

周必大

內則父子，外則君臣，人之大倫也。今者太上以仁聖綏萬彙，朕以孝敬極尊崇，天人和同，福祿並應，父子之道備矣。元首股肱，相須成體，則於君臣之際，可不共其光榮乎？卿以名世之儒，久儀廊廟，討論鉅典，黼黻厥文，所

謂嚴樂之筆精淵雲之墨妙蓋兼之矣用是進秩不爲  
無名况朕寘卿四輔之列咨卿萬幾之事寵章徽數未  
嘗有靳而獨愛此一官乎所請宜不允

賜叅知政事李彥穎上表辭免撰冊文轉一官恩

命宜允詔

周必大

昔大中祥符間執政王欽若陳堯叟皆以製述封祀夏  
頌之功超進顯秩載在國史有榮耀焉今朕脩稀世之  
闡典加太上之顯號而卿以高文大冊發揮盛猷是用  
倣章聖舊規循軋道近比進階四品庸答儒效而免章

嘗至陳義益高謂朕方策勵事功愛惜名器而身叅機  
政宜率朝紳夫遜禮之主也謙德之柄也大臣如此足  
勸多方豈以一官易茲二美敬從雅志良極嘆嘉所請  
宜允

賜李彥穎辭免差權提舉國史院實錄院編修國  
朝會要不允詔

周必大

信史垂後世之法類書哀當時之事皆大典也今自熙  
寧迄靖康有六十年未備之史則筆削不可以不嚴由  
建隆暨紹興有八百編已成之書則會粹不可以不續

雖討論屬之諸彥而董正資吾輔臣卿學該古今文有  
師法翊我機務言忠謨嘉舉茲以旃何職弗濟顧豈不  
能據三長以摠太史之任乎其趨汗青毋以遜避爲也

賜通議大夫叅知政事李彥穎乞解罷機政不允

詔

周必大

卿進繇德望叅秉事樞惓惓於納忠而未嘗近名孜孜  
於奉職而見謂知體中外寧謐陰陽燮調民實爾瞻予  
資汝翼定契如金石久方益堅相須如股肱理不可易  
豈以晦明之或爽乃於去就而輕言矧已造朝初無他

志深念簡毗之意迄攄康濟之謀所請宜不允

通 大夫叅知政事李彥穎上表再乞解罷機  
政不允不得再有陳請詔 周必大

朕寡念爲君之難自朝至於日中晏不遑暇食旣躬攬  
庶務又博詢衆言幸今方內小康民俗嘉靖豈敢自以  
爲功哉亦惟二三執政畢精竭慮協恭亮采之助也卿  
以忠醇篤實總領衆職期予於治端有望焉柰何股肱  
之力方劬而羸悴之語遽聞腹心之倚方切而退休之  
請狎主率作興事獨不念臯陶之颺言乎章雖煩煩朕

弗聽也所請宜不允不得再有陳請

賜通議大夫叅知政事李彥穎乞解罷機政改除

一在外宮觀不允詔

周必大

執政之臣朕所注意而民所具瞻也進退之際豈容或  
輕卿篤寶安和通明敏茂周旋二府累年於茲庶事浸  
康百工允治方隆眷倚其可去朝且卿昔以疾言尚有  
可諉今心志益壯筋力益強復圖便安斯亦何義勉安  
厥位毋拂予懷所請宜不允

賜通議大夫李彥穎辭免除資政殿學士知紹興



府恩命不允詔

周必大

卿質直好義恭儉惟德本之以學識華之以文藝立朝  
十載賢名茂著與政四基庶績乃凝自冬徂春求去彌  
僅朕旣不能奪卿之志矣鉅藩峻職又何愛焉夫朝釋  
柄於廟堂夕擁旄於帥閫出處榮矣班不離乎內殿地  
未遠乎王室待遇至矣尚體茲意毋形遜章所辭宜不  
允

賜李彥穎再辭免除資政學士知紹興府恩命不  
允不得再有陳請詔

周必大

駁以政名非舊弼鮮能至者帥繇廷授惟通才乃克當  
之茲均叅輔之勞誕錫兼榮之命卿體業端亮風規粹  
清逢辰有爲秉誼弗懈進裁丕務方倚於壯猷退保令  
名遽辭于高位聯宸宇之秘職剖藩侯之左符體貌大  
臣在予良厚股肱近郡於爾不遺已疊下於詔函毋固  
持于謙柄所辭宜不允不得再有陳請

賜資政殿大學士中大夫沈復辭免知鎮江府恩  
命乞除一在外宮觀差遣不允詔 周必大

御精明殫洽介潔簡廉萬里錫還言授之政而上書祈

見至於三四重違懈惻俾殿朱方借曰病衰猶當卧理  
辨無他恙安用固辭勉佩印章體予眷顧所請宜不允  
賜資政殿大學士中大夫知鎮江軍府事沈夔乞  
除一在外宮觀差遣不允詔

周必大

朕夙宵念道常患二千石不皆得人使吾德澤不下流  
民隱不上達方詔在位雜舉循良之吏而卿以帷幄近  
臣典股肱名郡茲固朝廷所嘉賴四方所則倣者也曾  
未半歲日需政成豈因懈瘍遂欲求去假樂之詩曰百  
辟卿士媚於天子不懈於位民之攸壘此言畿內諸侯

愛君勤職斯民所由體悉也勉遵古誼倡率庶邦稱朕  
意焉所請宜不允

賜資政殿大學士中大夫知福州軍州事充福建  
路安撫使沈復乞除一在外宮觀差遣不允詔

周必大

鄉儒獻夏方克自懋勉服休服采中外具宜向繇南徐  
往鎮閩部裕乃民如康叔勤小物如畢公日需政成不  
勸列郡遠思避寵殊異所聞詩不云乎樂只君子殿天  
下之邦樂只君子萬福攸同顧豈不濶盈爲慮哉所辭

宜不允

賜朝請大夫權尚書刑部侍郎兼侍講兼權給事

中程大昌辭免除刑部侍郎恩命不允詔

周必大

朕勿誤於庶獄惟有司之牧其在秋官厥艱付昇鄉學  
術議論篤於古而切於今服采在庭秉誼堅確攝貳憲  
部惟明克允參稽陟典升正其班昔舜疇咨九官臯陶  
以申明而無避汝之作士其亦久矣往踐乃次尚奚遜  
哉所辭宜不允



此三長寶曰良史往率同職孜孜不怠趣以成書來上  
毋爲退之之遜避可也

賜朝議大夫試尚書吏部侍郎兼侍講兼同修國  
史兼權吏部尚書程大昌乞在外宮觀差遣或  
小郡不允詔

周必大

卿強學力行遇事不苟躋登從列自結眷知天官劇繁  
正倚銓綜遽求外補殊異所期朕方汲汲人才惟恐用  
之弗盡旣擢用矣輕聽其去可乎祇率厥常益摠素蘊  
所請宜不允

賜朝議大夫新除權吏部尚書兼侍講兼同修國  
史程大昌辭免國史日曆所經修不經進官特  
轉一官恩命不允詔

周必大

朕出入起居惟恐不欽發號施令惟恐不臧史氏所書  
庶或無愧雖然此特兢兢日行其道耳豈敢自以爲多  
若乃歲奉王卮以介親壽業業之孝彌億萬年無有窮  
已其於簡冊實有光焉茲朕所以因篇帙之成推賞而  
致其喜也書不云乎一人有慶兆民賴之况卿古學英  
辭嘗與聞筆削之事進階示寵於理則宜又何遜焉所



辭宜不允

賜敷文閣直學士右承議郎知明州兼沿海制置使趙伯圭乞除一在外官觀差遣不允詔

周必大

朕聞大守吏民之本數易則下不安故雖遐方支郡猶擇人而久任况近畿鉅藩控制海道如四明者乎卿大器不羣居官可紀再分符竹治效益彰謹身帥先如文翁之守蜀足用愛民如僖公之保魯文老方借留不釋而朕輕許其去可乎毋棄爾成以究 興更之績

賜趙伯圭上表再辭免除開府儀同三司充萬壽  
觀使進封天水郡開國公加食邑食實封恩命  
不允不得再有陳請詔  
周必大

漢以外戚車騎將軍鄧騭儀同三司官名之立實基於  
此元豐而後尊禮天屬多由節鉞進領斯任親親賢賢  
善衛王室古今一也卿高明弗抗和易不流踐歷庶僚  
實名目超躋登顯服華問益昭班視象章象參台曜人  
臣爲大戚何敢私遜避之言固非矯激遂欲反汗不其  
難乎所屬宜不允不得再有陳請

賜趙伯圭上表再辭免除安德軍節度使提舉隆

興府玉隆萬壽宮任便居住加食邑食實封恩

命不允不得再有陳請詔

周必大

狀以授鐵專征之任寵綬同姓可謂不敢輕矣既稟太  
上之命又稽祖宗之制又協卿士大夫之議然後出節  
少府讀命大庭如渙汗焉何可回也矧卿忱恂肅哲足  
以承寧方鎮端莊信愿足以翼衛王家政倚宗彞毋勞  
謙抑所辭宜不允不得再有陳請

賜中奉大夫蔡洸辭免除徽猷閣學士與邵恩命

不允詔

周必大

勅蔡洸省所奏辭免除徽猷閣學士恩命事具悉六閣  
遠在西清學士班於內朝蓋朝夕論思之臣而非賦政  
於外之官也雖然入爲左右常伯出則下同庶常簾陛  
之間等級奚辨故假侍從清華之職用爲近臣出處之  
光馭下以恩予心至矣卿才猷行義力世其家謙恭恪  
勤不懈於位再司邦賦經費無缺請去之章奚爲沓至  
重違懇惻特畀降名深體眷懷毋堅遜避所辭宜不允  
賜徽猷閣學士中奉大夫知寧國軍府事蔡洸乞

除一宮觀差遣不允詔

周必大

維乃重祖事予仁皇總邦財則以贍足聞涖民事則以  
威惠著朕固嘗嘉歎其賢而易名於百年之後矣先烈  
之不墜繫卿是圖主計典州眷焉克紹日需報政惠此  
潛藩豈以微疴遽容自佚式遺藥喜稱朕寵遇世臣之  
心所請宜不允

賜降授大夫權吏部尚書兼詳定一司勅令蔡洸  
辭免經修進吏部七司法轉一官恩命不允詔

周必大

太宰以灑待官府之治其來久矣卿以名德之齋簡于  
朕懷擢長天官實兼議令用詩書而輔法律蓋有家學  
存焉逮此奏篇灼知勤勤進階一等時乃故常夫手定  
章程職居銓綜制而用之謂之法既已與聞推而行之  
謂之通固將有望抗章避寵其可曲從所請宜不允  
賜昭慶軍承宣使提舉佑神觀士歆辭免除保康  
軍節度使依前提舉佑神觀恩命不允詔

周必大

周漢世祚久長蓋得同姓藩維之助朕用時憲不專爲

恩卿屬近行尊謹飭而信厚司留務於兩使逮今年  
載疇厥勞俾領名鎮擁旄授鉞克壯宗盟亟其欽承副  
我親親之意所辭宜不允

賜左朝散郎試中書舍人兼侍講兼直學士院鄭  
聞辭免新除禮部侍郎依舊兼直學士院恩命  
不允詔  
周必大

朕惟秩宗典樂舜命二人成厝雖合於春官然大宗伯  
大司樂亦分二職今儀曹兼掌斯事任加重矣朕既置  
其長復立其貳倣古誼也卿以通才與學嘗總夷夔之

職粵司名命益爲國華庸正貳卿俾續前業顧郊禋密  
邇禮樂之用爲急使朕接三神之歡成一代之典正有  
賴於博洽而又何遜焉

賜朝議大夫試吏部尚書韓元吉乞授一州郡不

允詔

周必大

卿辭章麗則議論通明其在故家號爲翹楚朕所獎擢  
異乎諸臣方藉廉平澄清銓選抑資獻納倡率從官何  
嫌何疑遽欲治郡姑安爾職毋復有二云所請宜不允

賜中奉大夫試吏部尚書韓元吉乞畀一州郡不



允詔

周必大

治官在六卿中號為劇曹欲觀厥成必久其任卿心潛  
問學世濟材猷自陟從班即周旋銓綜之地庶幾精通  
法意檢梏吏姦使吾士大夫按格而至者功罪得其平  
能否當其分則其為報効也豈不賢於宣力一州

乎所辭  
宜不允

賜中奉大夫韓元吉辭免除龍圖閣學士恩命不

允詔

周必大

恭惟太宗以武定并汾以文致泰平聖謨寶訓實與河  
圖洛書相為表裏祕藏廣內冠于西清自非名臣豈容

假寵卿辭章近古學術造微領袖從官閱時寢久懇祈  
治郡莫得而留隸職其間人以爲允尚欽異數佇考民  
功所辭宜不允

德清大中乾元寺舊有塔乾道中沈作式重建初成  
燈火闔邑人呼之爲腰金塔不數歲鄭聞沈復李彥  
穎韓元吉相繼爲執政侍從

談志

餘不舊志寓公一百六人陳水南止存其六

沈應升

賜昭慶軍節度使致仕劉懋辭加食邑食實封不

允詔

周必大

朕歌成命之頌而殫夙夜宥密之心詠思文之章而懷  
立我烝民之德精神孚達瑞應紛委歛敷慶澤中外胥  
及粵我一二告老之臣名在歲里家擁旌節可獨遺乎  
夫均惠所以推天地之況篤舊所以廣祖宗之仁事異  
勸勞朕非以是私卿也

賜昭慶軍節度使知荆南軍府事充荆湖北路安  
撫使楊俛乞畀祠祿不允詔

周必大

昔我祖宗擢任邊帥近者十年久或倍之固未嘗踰歲  
而聽其去也卿選自籌帷鎮臨荆渚殫竭智慮予心載

寧今軍容壯矣不可以棄爾成民俗安矣蓋有以善其  
後奚爲引疾願上印章詩不云乎夙夜匪解處共爾位  
朕固不忘榦方之績也所請宜不允

賜昭慶軍節度使知太平州楊倓乞除一在外官  
觀差遣不允詔

周必大

當塗古號名邦在今日猶股肱郡也填臨於此非獨資  
共理而已蓋亦示優異之恩焉卿夙負才猷嘗參機宥  
剗裁劇務莫或告勞典治便藩固多餘裕胡爲抗疏願  
奉外祠旣大拂士民借留之心且將蹈守將數易之弊

三十三  
總乃服寧有後艱所請宜不允

賜昭慶軍節度使知太平州軍州事楊倓乞除一  
在外宮觀差遣不允詔

周必大

卿前上書丐還郡紱朕固嘗諭卿久任之指矣今財數  
月囊封隨至何其遽耶且年豐事簡民氣和樂古人所  
謂臥治而坐嘯者正可跋其高風毋切切以奉祠爲言  
也所請不允

賜昭慶軍節度使知太平州軍州事楊倓辭免知

隆興府恩命乞檢會前奏除一在外宮觀差遣

不允詔

周必大

朕顧瞻吳楚之間襟帶江湖之會古爲督府今號潛藩  
每咨擇於重臣往增隆於制閫卿器資沉裕材韞疏通  
蚤更踐於劇繁嘗參聯於宥密適茲謀帥無以易卿與  
其從容千里之中未殫遠略孰若填撫十連之重益著  
多庸亟思承命之恭難徇均休之志所辭宜不允

賜昭慶軍節度使知太平州軍州事楊倓上表再  
辭免知隆興府恩命不允不得再有陳請詔

周必大

朕於謀帥可謂難矣既欲其資望之高使列城奉令而  
承教又欲其政事之敏爲斯民興利而除害兼是二者  
在卿爲宜故自偏州改臨鉅鎮節旄增重祭戟有光徃  
布藩條寬吾西顧逡巡固避豈所望哉所辭宜不允不  
得再有陳請

獎諭昭慶軍節度使知太平州楊倓詔

周必大

勅楊倓省三省進呈卿劄子勸諭三縣食利人等增築  
管下私圩畢工乞將圩內淳熙五縣增築

補一

本州自行抱認起發事古者叮原防規偃潯然後可  
以稼下地今大江以東其穀宜稍勸農闢野不在良二  
十石乎卿以樞機近臣出鎮姑熟躬行阡陌勞民不怠  
既督治私田以興其利又代輸公賦以報其力使千里  
之間有豐穰之望無水旱之虞歟庸茂焉何愛璽書以  
爲循吏之勸故茲獎諭想宜知悉

賜簽書樞密院事李彥穎上表再辭免除叅知政  
事恩命不允仍斷來章批答 周必大

朕惟願治之君以知臣爲急有志之士以逢時爲榮相



得益章古人謂之千載益難之也今朕拔卿十年之間  
與諸二府之列有爲則女聽有言則汝從明良相須庶  
幾無愧茲由樞筦晉翊台衡匪卜匪占實惟朕志蓋軍  
政明然後可以圖國政武事飭然後可以脩文事不易  
之序也卿宜思古今遇合之難展疇昔經綸之蘊共恢  
遠御亟裕多盤舊次姑安非予所望所辭宜不允仍斷  
來章

賜叅知政事李彥穎上表再辭免進書禮儀使特  
轉兩官依例加恩恩命不允仍斷來章此答

周必大

朕被堯之衣誦堯之言行堯之行十五年于茲矣既稟  
奏興善政凡九百五條以舉其宏綱又會中興故實至  
三百篇以撮其機要猶以爲未也趣千卷之書記三紀  
之事涓辰備物親帥群臣進讀於德壽之庭肇自顯穹  
生民以迄乎漢唐有此典禮乎無也惟予近弼實相盛  
容正使推恩不著於舊規猶當以業鉅事叢而創行之  
况二府領使有相承之例乎卿其勿疑亟服嘉命

賜李彥穎辭免除叅知政事不允仍斷來章批答

周必大

有勅經務神樞已殫碩畫贊謀鼎鉉更藉宏摹其視訓  
言毋專廉遜

賜李彥穎再辭免進書轉官不允仍斷來章批答  
周必大

有勅史觀成書講一時之盛典輔臣相禮進二等之崇  
階成命已行固辭奚益

賜昭慶軍節度使致仕劉懋再上表辭免加食邑  
食實封不允仍斷來章批答  
周必大

省表具之古先哲王罔不明德恤祀亦罔不配天其澤  
身朕紹服其曷敢不勉乃十一月壬午蒞祀於上下歛  
時多福敷錫有衆越在內百僚庶尹暨在外侯甸男衛  
邦伯咸大介賚之矧敢遺里居之舊豐爾邑厚爾祉以  
熙天休命往欽哉毋庸固辭

賜叅知政事李彥穎生日詔

十二月十四日

周必大

勅彥穎商正建丑周嶽生申蔚然邦國之英藉甚廟堂  
之譽四人廸祿誕將丕冒之威三壽作朋胥軼俾昌之  
祉茂膺蕃錫永弼宏基

賜參知政事李彥穎生日詔

周必大

勅彥穎季冬令月幾望良辰紀蓬弧始負之祥凜松柏  
後凋之操特豐賜式嘉寵輔臣尚綏壽考之祺永贊明  
昌之運

賜參政李彥穎生日詔

周必大

勅彥穎卿三年輔政一節匪躬當此歲寒記其誕慶壽  
祺之祝家國所同往致恩敘用資燕飲

賜前執政知鎮江府沈復銀合膈藥勅書

周必大

勅沈復季冬之月天氣沍寒按錄桐君裁成珍劑眷言  
名鎮方倚舊人特厚恩頒用資冲攝

撫問賀金國正旦使副莫濛孫顯祖到闕并賜銀

合茶藥

周必大

有勅卿等咸膺遴選遠聘殊隣茲成禮以言歸嘉遵塗  
之辰勩馳頒茗劑往勞駉駉

賜知太平州楊俛福建路安撫使沈復銀合臘藥

勅書

周必大

勅楊俛沈復卿夙聯樞近外寄藩維屬此沍寒勤於宣

化分頒良劑昭示至懷民瘼有瘳朕心則懌

賜趙伯圭除節度使告

周必大

有勅卿蔚以宗英孚于衆望俾遙臨於節鎮庸夾輔於京師欽帥訓辭益圖報禮

賜趙伯圭除開府儀同三司告

周必大

有勅恩昇碧幢夙隆異數禮均黃閣益峻徽章往承錫命之優思稱展親之厚

乞序位李彥穎下劄子

周必大

臣嘗考國朝故事侍從而上或偶舊人再入其序位多

在見任人之上非獨重朝廷之體亦以興廉遜之風伏見叅知政事李彥穎數年前已位二府今者再入臣合在下理無可疑伏望睿慈特降處分以憑遵守今取進止

第二劄子

周必大

臣適具奉乞序位在李彥穎之下緣欲降附三省未敢盡述底蘊伏見熙寧二年文彥博以舊相爲樞密使陳升之初拜宰司神宗用天聖故事特令升之仍位彥博之下雖王安石力沮彥博收回成命然詔書具在聖意



高遠非安石所能知也夫宰相樞密使位序有差國朝尚且迭爲先後況同是參貳班列一等謂如元豐以後同知樞密院尚書左右丞或互有除改則位次不易其來久矣臣之末至自應在彥穎先進之下尚復何疑

芮氏家藏集序

周必大

夫子曰有德必有言謂其和順積中英華發外也今於吳興芮公見之公諱燁字仲蒙一字國器孝弟忠信博習修潔登第後每有慷慨憂時之志鄉里前輩如劉一止沈介諸賢皆敬愛之紹興末高宗將內禪殿中侍御

史蜀名士張震以名聞高宗曰是能古文者卽日擢監察御史已而出入中外爲孝宗深知許以侍從兩朝眷遇蓋如此不幸自司成移疾而終年總五十八予在從班與六曹長貳給舍相與悼嘆共爲奏云伏見故國子祭酒芮燁德配前修文高當世恂恂自守未嘗與物競及當官而行則秉誼持正有不可奪之志故相秦檜時鄉人沈長卿作牡丹詩有許以爲謗訕者引燁爲証廷尉捕治燁力辨其非長卿不任箝掠親書証伏獄吏以示燁燁曰長卿証伏則可燁豈敢証証吏別擿燁尉仁

和時所作詩有今作紅塵奔走人之句坐以怨望及

上遠竄武岡謬不自明公道闕開收寘臺省

已而出使廣東節操彌厲凡舊例供饋積至數千緡濟  
輪公帑歸過曲江班犒郡縣吏之乏月給者初不違衆  
清不近名不流不倚大率類此陛下自司業陞之祭酒  
知其經明行脩剛柔兼濟諭宰臣云侍從闕急用之會  
燁請祠優進右文殿修撰兩學生員祖道千計觀者太  
息按燁初除司業在軌道五年八月家居一日可至是  
時官已員即供職滿歲則六年冬祀法當任子燁遂巡

踰時乃起遇却不及者兩旬又按祭酒從四品序位太常宗正秘書少列之上燁疾未革少留數日必遷不然休致遺奏亦官二子而燁緩於來復決於去爲子孫計者肯如是乎願錄衆美精忠還其恩數使天下知聖朝尊賢厲世不間存沒書之史冊足勸廉遜非創典也衆皆稱善惟公同年生給事中者難之衆自欲上奏或曰銀臺異論如格詔何衆惘然而止其後上念公不已用其弟燁爲八座公之諸子多有入官者此非天平始予爲學官館職史官御史皆未煖席公輒繼至爲正字也

公有呂虔贈刀之夢暨聞公討于復夢作祭文祭公覺而記其四句曲盡公德云君子所恃而亦不比小人所畏而亦不忌此殆神交也今公子邵武太守正言上高宰及言等衷公易傳一卷詩四卷奏議二卷表啓書劄論策記序雜長短句共廿七卷屬予爲序惟公博通諸經尤長於易坎之象曰君子以常德習教事人多以治已治人爲說公獨嘆曰坎惟素習則在險不失其常險至方習亦復何及故初爻獨云習坎他爻曰坎而已雖然習當出險乃復入坎當者爲陰柔小才說也其論離

卦九三曰日月中必昃人生必死當如魯參易簣子路結  
纓怡然死生之際嗟則惑惑則凶矣卽二者考公平生  
所謂非苟知之亦允蹈之者歟至於他文正大而詞達  
詩篇純粹而味永皆有德之言也予故首陳兩朝聖鑒  
次列侍臣公論然後記予與公親厚本末如元城劉忠  
定公序丞相忠肅公集過於詳云

沈氏論語解序

周必大

揚子曰聖人之言遠如天賢人之言近如地易更三聖  
詩書禮樂春秋皆刪定筆削於夫子之手此聖言也孟

荀揚韓發明經訓羽翼治道此賢言也兼是二者其惟  
論語乎蓋齊家治國立身行道夫子平居形諸言者如  
二辰著明有目咸睹莫知所以明如四時運行無物不  
莫知所以行非天乎門弟子或求益或質疑往往指  
事而請譬之山川有定體高深猶可度草木有定形名  
物或可辨非地乎是誠五經之管鑰六藝之喉衿學者  
如欲時習聖賢之言舍此何以哉吳興沈文炳字堯夫  
家世儒者少有聲國學養親不仕惟留意於是書其子  
數抱遺編求予一言易不云乎仁者見之謂之仁知者

見之謂之知亦資道以盡吾之分而已其視作無益而  
攻異端者益相萬也嘉泰壬戌臘日

劉諫議諫彙序

周必大

故諫議大夫劉公諱度字汝一吳興人自爲布衣修潔  
博習業左丞夢得汪翰林藻皆以賢良方正薦旋第進  
士入爲學宮館職紹興三十一年夏汪中丞澈薦克御  
史遷右正言明年汪貳大政引嫌徙軍器監孝宗卽位  
復自宗正擢諫議大夫前後上九十餘疏其子瑞金宰  
深知裒成上下卷以寄嘗同僚請爲之序共惟祖宗專



任臺諫寄以耳目政事得失臣下否臧雖均許論議然  
諫臣因治體而及人才臺臣因彈劾而及時政其分職  
固不同元豐七年春神宗手詔曰近歲修復官政群司  
各有職守右諫議大夫趙彥若侵越御史論事降一官  
左遷秘書監今公奏議心平氣和理正詞直薄物細故  
未嘗屑屑至於小大之臣麗於過失必隨事以言知諫  
官之本意或謂漢孔光上有問據經對不强諫爭懼章  
主過削其橐自後世觀之果光患歟善乎蘇軾草諫官  
制曰進則詭詞退則焚橐衰世之事朕無取焉然則深知廣

父書予序其書所以彰主聖也嘉泰四年月日

題干祿書

周必大

予讀開成四年湖州刺史楊漢公跋顏魯公干祿書碑云工人用爲衣食業晝夜不息刻缺遂多親侄顛頃牧天台欲移他石資用其乏不能克終漢公謬憇棠陰得以餘俸成之乃知唐時不敢妄用公錢如此近世若止刊刻文字乃是伯夷公儀休其他以公帑爲私帑可勝計哉淳熙戊戌七月二十一日夜偶書

題東坡與佛印元師二帖

周必大

國極老僧彦岑年八十坐亡於湖州道場山留手書并  
以坡字寄予爲訣時淳熙乙巳臘月二十七日也昔佛  
印元師住金山東坡往來數見之嘗以玉帶衲裙相贈  
和計平時書問甚多此三帖始元祐中所作耶明年正  
月十五日某題

跋湖州沈壽岡之祖墓銘後

錢藻撰

周必大

志墓有美而無箴久矣然東坡謂錢翰林陳義崢嶸不  
少自貶則其所以稱寺丞其諸異乎人之稱者歟隆興

元年正月二日

跋劉季高與溧陽筆工顧綱帖

周必大

杼山老人筆精墨妙獨步斯世而顧綱之藝數見褒稱東坡詩中李文政也乾道三年八月辛酉

跋李次山霽溪漁社圖

周必大

唐元結字次山嘗家樊上與衆漁者爲隣帶笭箬而歌歎乃自號盤盂今河陽李君元明之名字也卜築霽溪又號漁社其善學柳下惠者耶始乾道間予官中都君以先世之契數攜此圖求跋自念身游東華塵土中欲爲西塞溪山下語難矣屬者奉祠廬陵所居在城東隅

去江無五十步湖名白鷺橫陳其前日以扁舟實綠葦  
闔鷗來相從百住而不止雖未敢竊比張志和亦庶幾  
乎元次山矣而君方以尚書郎奉使全蜀凡六十一郡  
之官吏數十萬之將士莫不歛板受束約斷枚聽號令  
猶念舊社不置萬里遣書與圖偕來督踐前約予欲遽  
數忘機之樂則君權任如此顧豈招隱時耶須君他日  
奉計其泉厓直承明尚寄聲於我嘗有以告君今未可  
也姑題卷軸歸之紹興元年三月三日適逢丁巳青原  
野次周某觀

題沈傳師碑

周必大

道林以四絕名堂沈居其一歲久堂壞葺而扁之又得  
沈碑於公帑移寘堂上別刻本留郡齋紹熙癸丑十月  
旦假守周某題

題俞洪所藏滕元發與俞退翁詩

周必大

四朝國史於遺逸中立俞退翁傳大槩用孫莘老所作  
墓表惟自西川召爲御史力辭不拜墓表但云以闕員  
召傳乃謂王介甫藉其清望使擊故老夫清德安肯妄  
發介甫用人寧不察此竊疑滕元發嘗倂湖州退翁郡

人熟知其言觀所贈詩帖當熙寧元年神廟待元發方  
厚擢爲中丞必舉幕屬退翁之召或以其薦即可知矣  
是歲十二月元發改翰林明年春介甫得政素惡元發  
出於外知幾而退是乃所以爲退翁舉主補外自應隨  
罷耶墓表不書其由莘老亦常攻元發故也慶元丁巳  
十一月望退翁元孫洪相過出示元發詩翰妄意如此  
來者或有考焉退翁子孫甚盛豐積舊取之報洪復醞  
藉疏通稱其家者也

與葛楚輔樞密書二首

周必大

某竊以芳春妍淑化日舒長共惟樞密周知綬靖華文  
神天顯相鈞侯動止萬福某家居得遂野性芘覆厚矢  
遙聯門牆正阻承教臨風悵然敢乞加衛寢饋永弼興  
運某違去鈞表遂將周歲道德可尊固與衆人同一瞻  
仰眷與素厚私心倍劇縑繆書牘缺然則以用舍正異  
勢當爾耳高明無所不燭而又常善恕物得免於戾已  
爲厚幸走介而予之書此禮何敢當此意何敢忘也  
怨  
叙謝莫究萬一敢幾垂察某仰惟明公問學文章世  
濟其美至於德業之茂謙和之至則又本於天資而加



卷之六  
三十一  
三十一  
龜焉是宜上結主知下孚物望自登政路忠言嘉謨表  
在人耳目麻案計已宣布值國盛典榮晉崇秩益未  
小多賀也

某仕不知止顛沛固宜上賴聖主隆寬二府曲爲道地  
使得奉祠歸里一出十五年交游零落殆盡老病復疲  
應接省僇言之外困眠饑飯而已最是目力昏乏書冊盡  
束高閣舊好游山今復足力不強前輩云少年真可喜  
老大自無益今方知爲寶錄每荷眷念輒具布之

與程泰之侍郎書三首

周必大

某竊以肅霜在序恭惟某官年兄道腴日勝台候動止  
萬福向者謝牘旣遣卽被誨墨有以見情意相與致書  
郵交馳於道感幸無已今復祇領榮問知愛益深展誦  
把玩殆不容去手但恨無羽可飛墮雪溪之上耳氣候  
日冷願言加苾晷茵以對嚴召某伏蒙別紙諭及非相  
愛如骨肉豈肯及此此固不敢望於他人也葉謨所言  
向拜書似曾布稟矣此方簽兵治器械打舟船修城壁  
諸路探報極多竊意虜注北法疑我襲其後固爲恫疑  
虛喝耳然其子監國與余汴之統軍烏林答天錫者素

有踴躍用兵之志因而生事亦未可知太要彼國傳授  
之後定須妄作在我不過自治內修而已如所謂檢點  
防城器具會計海舟教閱民兵前此率二三年一爲之  
故中外不以爲疑五七年來一切不講忽聞舉行便自  
驚駭至於明年卽爲常程所謂民難於慮始者旣在其  
位不容避也若僕身上事則又多端以不才而冒居政  
地且稟性踈直好好別白是非言無隱情宜其被謗不一  
猶幸時無張方平王拱辰未至巧法奇中耳每自憐復  
自笑也

其辱誨翰喜承政清民和神所聽相台候倍膺休祉請  
祠足見遠慮聖意既未前只得少需也易老通言方歎  
服不暇而處通二郡相繼以易原見示探先聖之祕發  
後覺之蒙何待後世楊子雲耶其用過其量殊不自安  
薦士被劾自當引去方欲繼請又值闕雨策免何疑遠  
則杜邠公近則洪景伯月日適相似聊發一笑

某比辱誨翰示以老子解旣佩勤眷且知深窮性理真  
欲接袂浮丘不但結緣香火良切嘆服未審全書可得  
見乎蘇黃門所著學者共傳之兄當無靳也方圖具謝

游札著筆意愛深厚舉世少雙感幸謂宜如何餘暑恭  
承台候萬福又以爲喜下諭恐有由來自古稍肯爲時  
出力必爲衆忌吾曹豈不知此但不忍欺心欺君耳今  
雖未覩端倪然有此理自推五行此去亦非安坐廊肆  
者人生定分毫髮奚逃爽考平生得失蓋亦可知若欲  
逆料其間必至美巧成拙失邛鄞之步兄以爲然否只  
今滿朝更無一士見與非必有所鄙惡勢則使然用是  
未嘗尤人獨兄參辰相望而膠漆益固感激深矣虜儲  
旣沒未聞所立何人今冬似無他然江浙閩廣同日地

震太白今經天安得不懼所懷千萬非書能盡姑報來  
况餘乞珍御冲理蚤遷嚴近劉弼又得祠蓋在轄在越  
偶同僚耳繼此有聞切告毋大小虛實乞賜警飭

與周元持侍御書

周必大

某皇恐死罪孟冬薄寒恭惟侍講侍御台候動止萬福  
某自收朝蹟日與農夫爲伍繇丞相而下皆不敢輒通  
姓名屬者明公自諫省副臺端崇言竑議日進於上前  
雖坐與中外同受大賜亦不敢輕致賀問勢當然也豈  
謂憂國執法之餘猶記寒遠手書問勞如待當世之賢

者內自忖度不知何以得此也方感激不置俄有客自  
城中來者具言主上以間日訪道爲未足詔闕殿廡命  
徑筵官更直其中而明公首以百篇之書入侍矣退而  
以此仁祖用臺丞預講讀故事也慶曆嘉祐之治其  
後見於今乎未數月則又聞有進專風憲之命喜極殆  
欲起舞其所以喜者非謂出入門墻之舊竊竊然慶明  
公道擢也聞古有師氏者以媿詔王且居虎門之左司  
王朝夫媿之爲言自微以至著而用虎名門取義甚武  
二者疑若不相似然乃命一官兼之取義深矣後世指

談經講道爲儒者故其弊也或迂闊而委靡謂排姦觸  
邪爲法吏故其弊也或刻轢而激訐主上方鑒古御今  
以師氏之職處明公明公必將以正心誠意之術朝夕  
納誨大學之言曰身修而家齊家齊而國治國治而天  
下平堯舜三代不難致也如某者雖無用於世自放寂  
莫之濱亦且安其耕鑿而無藜藿見採之慮欲無喜得  
乎先以自賀然後賀執事

答江陰李教授沐書

又有與其父秀叔  
及沈持要書不錄

周必大



七月日具位某謹復書教授修職足下古者公卿大夫之家其父兄旣植德累功於前其子弟復增修積美於後傳祀數百不隕其名是之謂世臣巨室及其季也第門圭竇之人暴登貴仕而公侯子孫往往降在皂隸國之興替常於是乎卜之本朝盛時如文元晁氏忠獻忠憲二韓氏文正范氏宣獻宋氏申國呂氏或文獻相承或德業交著因事立功與國同休至於今賴之惟會稽公以厚德通儒範模斯世蓋嘗運樞機釐政事矣其進退出處無一不合於義凜乎有異時大臣之遺風足下

又能力濟其美年方英妙已馳儻聲於大學取巍科不  
翅拾芥自常情言之亦可無求於人矣方且孜孜乎前  
輩之事業切切乎當世之師友此豈獨天資茂美刻意  
問學所能致哉過庭之間議論聞見其必有大過人者  
進修不已國家之與將有助焉如某不肖欲通姓名未  
敢也豈期過聽示以漢史論著及詩文三編先之以長  
書禮下而詞溫若欲僕助成其名者伏讀累日初如觀  
富商大賈之藏四方珍異莫不咸在少焉如游十二閑  
騁驥駟耳飛兔麟駟驥首驚駿可喜可愕何足下富於

學蒙於文一至此也昔子貢問子石曰子胡不學詩子石曰吾暇乎哉父母求吾孝兄弟求吾悌朋友求吾信吾暇乎哉子貢曰請投吾詩以學於子今足下事親養志既孝矣推其所得日與諸弟講論道義作爲文章繼被薦送既悌矣金閨諸彥山林之奇士皆折節與之友既信矣僕方當投所學以學於足下足下於僕何取焉銘佩謙施言不能盡屬病起氣乏具謝不宣

與程倅

準

書

周必大

適日凝寒緬惟孝履支持先尚書與學碩才獨步當世

雖登八座未究素蘊引年而歸公論翕然謂當享百年  
之期主盟斯文奄爾淪謝士大夫無不嗟惜况契愛至  
厚者乎今年來夢相見甚頻雖出慕仰亦由尚書將遂  
僊去故爲是神交耶臨風倍切悲悵屬杜門人事盡廢  
尚稽致唁忽得令侄宣教書悲駭無已浙兵不慣遠涉  
在道頗久立便要歸未能辦微禮私居又重於借急足  
尚圖後信餘惟節哀自重不宣

答沈編修

瀛書

周必大

某竊以炎威正熾共惟崇道編修台候萬福某衰病不

才分無他望忽叨進擢不特大駭物論自亦不知所措也委誨勤懇以感以愧執事家食滋久士論稱屈近者王景文起倅廬陵嘗爲丞相言朝廷無棄才之理使誠有過猶當計歲月乘除之况本無過乎某自度實無寸長至於以一己之私撿天下之英才是謂逆天理誤國事斷不敢爾矧於執事有舊而無怨第于丞相自當贊成也怱怱占報莫究悃悃願加保齎以需召節

答胡湖州

南逢書

周必大

某竊以歲晏凝凜共惟知府郎中台候動止萬福上考

機書宣勞多矣歲中所發上供幾至百二十蓋繙何其  
益也使治既中熟又不曾和糴所論糴濟莫不至如常  
潤費力否德清楊宰固可罪但用此罷去則他邑村夫  
習知長官可脅將復效尤有言鑄楊一官以符君侯之  
言他日或有過重劾未免想喻此意忽忽布復莫盡所  
懷願言保壽卽慶環召

賀沈相該啓

周必大

伏辭誕布策書進持魁柄高宗得說迺我后以康兆民  
尹公暨湯享天心而有一德甄陶伊始耆稚注觀竊惟

極治之時斯有非常之佐如風雲之從龍虎勢蓋必然  
若乎是之視腹心理難偏廢荷歟盛事屬我熙朝恭惟  
承宣道覺民先智周物表精微內蘊有移風易俗之心  
事業外彰皆尊主庇民之術蚤結聖神之眷徧揚嚴近  
之班宣勞再總於十連注意彌隆於萬乘吾不見賈俄  
與宣室之思使果召參遂理舍人之橐促登文陛峻陟  
政塗上方虎已以仰成公則竭誠而入輔威名行遠蠻  
夷尚裴度之年盛德在人朝野望楊公之相式符帝賚  
首冠台纏總萬機繫委之權宅左揆辨章之任恥君不

及先舜昔聞仁義之談致治庶幾成康今展經綸之志  
廊廟增重華戎具依某擊柝官微挈瓶智小當巖石維  
新之日亦帡幪受賜之人開孫閣以延賢知難進跡掃  
齊門而求見庶遂執鞭欣幸交深編摩奚究

謝吏部沈侍郎介啓

周必大

茲蓋伏遇某文華緯國術業康時自連楫於賢科卽高  
騫於清路六卿率屬旣登二於天官三格修書復茂明  
於皇統當論思之餘暇推獎借之公心遂致陳人猥膺  
遴選民安渤海願希龔遂之風福及京師更效■戾之



政其爲感幸豈易名言

賀閩中提舉周郎中操啓

周必大

請外撫章臨軒授節朝宁嘆急流之退海邦瞻層使之  
惟某官重厚有常疏通無滯素蘊淵源之學適逢  
休顯之時雙宇峩峩久授絳緹之業中臺清切首百錦  
帳之香逮兼宰士之聯將綴從臣之籍力祈去國爰昇  
乘輅北苑靈芽獨幹阜通之利南州陳粟坐收越成之  
功惟清朝正急於掄材顧雅望難稽於持橐南端壯轡  
卽返駕班某檢風聲於多士之闕託雲庇於鄰封之內

高山在望未降旣見之心尺素可持少叙願交之意其  
如烟悞難盡名言

上沈丞相啓

沈方進易解

周必大

柱石王庭久仰棟隆之吉調膺公餼方觀鼎寶之亨欽  
惟兩儀交泰之時內盡四體觀頤之道休有自天之祐  
來臻視履之祥恭惟某官博大以方輝光而實備賢人  
之德業懋君子之經綸黃裳之文足以藻飾乎治世白  
賁之質足以砥礪乎貪夫早值離明屢膺渙渥作樂而  
薦上帝妙制作於春官施命以誥四方罄論思於夜直

物謙謙而有吉事君蹇蹇以無尤知微知彰知柔知  
直寢陸於中外或出或處或默或語道每順於盈虛  
運九重華故之秋乃泮小剝廬之日真才萃聚何止十  
里之龜大號夫揚有蕃三接之馬車積中而任重川利  
涉以安行方且懲忿窒慾而堅二簋之誠思患豫防而  
盛出鄰之輪求玉明以受其福除戎器以戒不虞萬國  
咸寧百官以治永禪天地之長久無復冰霜之始凝其  
職典童蒙身居豐蒨念邇如之甚久每嗟若以自憐况  
衆賢皆願於詭隨豈小魏敢懷於盱豫待時而動妄思

尺蠖之伸觀國之光肯作羝羊之觸頭普屯膏之施仍  
寬資斧之誅如是則鶴鳴在陰庶假好縻之爵鴻漸于  
陸亦叅可用之儀進必有歸言不盡意此啓

賀揚州劉安撫峯啓

周必大

一麾出守甫被詔除十國爲連就膺闡寄上列侯之印  
組植元帥之旌旗喜極旄倪光生巡管恭惟某官士林  
宿望禁籟老成如漢君房言語妙於天下如唐子厚議  
論屈其■人早輝啓沃之心久袖經綸之手逮聖神之  
圖舊須哲人以奮庸存膺宅牧之求用示秉鈞之漸民

之攸墜口興襦袴之謠王曰遊歸卽奉絲綸之命某猥  
塵使事密借鄰輝挹淮海之潤波通津不隔想平山之  
風月半坐遙分惟欣頌之交懷匪叙陳之能究

賀沈正言

潘啓

周必大

誕布綸恩擢司言責輟烏臺之六察叅騎省之七人公  
道旣開輿情胥予恭惟某官氣和節勁志大才高旣問  
學之家傳亦剛方之世濟談經朱邱涵遠業以靖共奉  
對丹墀罄嘉猷而啓沃雖親推丞弁於峩豸而昌言未  
究於伏蒲遂自南臺進叅右掖魏公輔國遠追文正之

遺風吉甫圖近見贊皇之賢嗣諒纔溫於坐席卽交  
乘於政機某跡次江干依仁宇下聖賢相逢而張治具  
已際明時日月亭午而息邪陰更觀盛事其爲欣懌難  
盡名言

谷平江沈侍郎介啓

周必大

內出左符起臨右輔吏民朝見條教夕聞恭惟某官備  
九德以飾躬肩寸心而許國修門三入進以正而甚榮  
諫匪萬言去未幾而輒驗茲逢新政乃眷舊人親頒一  
札之書首實諸侯之選誅狐狸於七日士知繩墨之難

踰汰雁鷺者百曹民喜鋤筒之坐絕交方待補公盍來  
歸某久遠賓榮常依德宇長牋例拜驚看春藻之華盛  
禮逆施愧甚夏畦之病其爲感激豈易敷云

除左使答湖守陳阜卿啓

周必大

分察南臺初無一善叅華左掖豈有三長歷上命以領  
水酌輿言而內愧此蓋伏遇某官望隆邦哲才號吏師  
縉紳之所範模旒辰之所簡注河潤九里可令枯朽之  
含滋袞襲一言坐使駑駘之增價遠容咄畢猥預書言  
尺牘未馳正以京塵之汨沒長牋見及足知郡政之優

游感激在中敷云莫盡

回福州帥賈侍郎選啓

周必大

簡求禁彙擢領藩符涓日之良殿邦之始恭惟其官家  
傳學術世號吏師典郡著廉平之稱登畿馳休顯之譽  
於厚宸知之渥越躋法從之華適圖即於七閩肆圖綸  
於圖陞海山環境古稱富盛之鄉冠蓋盈城今日詩書  
之國佇報中和之政卽還嚴近之班某過辱書函備形  
謙柄其如悚感未易敷陳

問候葛侍郎啟

周必大

藝文補

卷之十九

四十八

宋文



櫟社扶疎昔依仁於華省蓬心拳曲今結戀於朱門欽  
惟賢哲之所臨密有神靈之來相內凝妙道外納時和  
恭惟某官應物以俊明之資資處躬以渾厚之德詞章峻  
潔如東流赴海之莫磯問譽輝光若北斗麗天之可仰  
掖垣掌制文部典銓世傳常袞之除書人服山公之啓  
事謂合言登於黃閣云胡引去於青都結何山杖屨之  
緣作茗水龜魚之壘冲襟逸興雖寢忘紫橐之舊游雅  
望英聲當勉爲蒼生而再起某久應襍被尚許濫衿蝶  
夢空勞莫遂接辭之便魚書遠至少伸問訊之儀悃悃

交懷褚毫奚盡

宋故龍圖閣學士宣奉大夫致仕新安郡開國公  
食邑二千一百戶食實封一百戶贈特進程公

六日

神道碑

周必大

故吏部尚書程公以龍圖閣學士就第踰年而卒其子  
準等持兵部侍郎楊公大澧所狀行實屬必大以銘予  
與公同年進士數嘗同僚厚我莫如公知公莫如我其  
何敢辭恭惟孝宗皇帝聖學高妙厲精政事尤有知人  
之明惟公歷兩省六曹以該洽直諒見知相與論道統

評政體在廷少比公亦忘身徇國思爲朝廷植悠久之  
計其在外則心乎愛民長慮却顧未嘗便自營自營士大  
夫皆以不大用爲恨及事壽康皇帝與念舊僚疊加恩  
禮而左右乏裏言公亦老矣無意仕進得謝於家盡發  
所蘊著書立言啓迪後生蓋其自幼至老禴祥卜祝無  
所信玩好技藝無所嗜惟通經評史考古驗今一事未  
詳一理未窮弗措也其始終大槩如此若乃爵里議論  
則可一二數公諱大昌字泰之按程氏其先出自重黎  
周有休父封於程地在關中子姓散居西北有開府儀

同三司靈洗者效節蕭梁著功於陳封忠壯公南史以爲新安海寧人卽今徽州休寧也厥後或北歸或遂留故公爲休寧人曾祖晟娶洪氏祖士彥娶金氏父昞累贈正奉大夫妣淑人陳氏世積善尚義孜孜教子至公穎悟殊常見十歲能爲文紹興癸亥重立太學年甫冠矣一試卽預選學官爭爲延譽二十一年登進士第以左迪功卽主吳縣簿丁正奉憂服除獻文於朝宰府奇之二十六年除太平州教授明年召爲太學正三十年詔館職必試乃除初召朱熹載等再召劉儀鳳等皆辭

上命宰執擇人不許辭以公應召仍諭上旨遂除秘書  
省正字改左宣教卽三十二年六月孝宗受禪擢著作  
佐卽初政銳意事功命令四出貴近或預密議公因輪  
對及之尋命百官條弊事公文極言漢石顯知元帝信  
已先請夜開宮門之詔他日故投夜還稱詔啓關或言  
顯矯制帝笑以前詔示之自是顯真矯制人不復言國  
朝命令必由三省防此弊也請自今被御前直降文書  
皆由省審奏乃得行以合祖宗之規以防石顯之奸又  
論去歲完顏亮入寇無一士死守而兵將至今策勳未

已惟李寶提膠西虞允文戰采石實屠亮之階今寶罷  
兵允文守藝此公論所爲不平也上聽其言三皇子就  
傅遴選官僚九月以公爲尚書駕部員外郎兼恭王府  
贊讀又兼兵部郎官隆興元年兼慶王府直講十二月  
丁母憂軋道二年春服闋召爲考功員外郎六月復兼  
恭郎贊讀八月遷國子司業三年十二月兼權禮部侍  
郎一時文柄舉屬公其成就人才不可計凡今老師宿  
儒多公門生也五年正月兼權直學士院宣對選德殿  
上曰朕治道不進如何公知上志在恢復迎合者多即

奏陛下勤儉過古帝王北虜自通和知尊中國不可謂無效但當求賢納諫使政事日修則大有爲之業在其中不必用迎合之言求奇策以幸速成又言淮上築城太多緩急何人可守臣謂設險莫如練卒練卒則在選將上深然之後數日再召對上曰卿前言朕儉是也獨病風俗太奢用度不足今早與大臣議立法以止之公奏居室衣服吉凶之禮皆有著令要在上之人持久以化之耳上又問卿更有何事爲朕言之公曰事有大小有先後今四方獄案必經聖覽大臣因是亦困省闕何

暇議大事急先務乎往陛下嘗增左右司爲四員若漸  
復減員分以委之中書之務清矣後數年迄如公言八  
月除直龍圖閣江東轉運副使蓋公求試民事故以卿  
部寵之公引嫌改浙東提點刑獄越帥多大僚適歲豐  
酒稅溢額漕臺不敢問乘公攝帥遣其屬挾朝命括羨  
財且將增額公力拒之曰某寧罪去不可增也越人迄  
今德公七年復徙江東運副詔勿引嫌公猶不自安踰  
年乞祠就徙江西路公曰可以興利除害行吾志矣九  
年歲儉出錢十餘萬緡代輸贖吉臨江南安四郡五等

藝文補

卷之十九

五十二

宋文



變稅折帛過饑民爲盜之原又遷吉州造舡塲於臺治  
以省費葦樊凡吉舊欠皆捐之清江縣有破坑桐塘兩  
湖捍江四十里護田千三百七十頃民居陸地又三百  
餘畝壞四十年歲罹水患公力復其舊又奏漕臣遇代  
積累欠數病州縣乞行蠲削淳熙元年冬詔可凡軋道  
七年八年諸路欠稅賦丁役及他錢物併除之由公一  
言上恩及天下矣歲滿再任進告不下宰執問其故上  
曰程大昌職事脩舉自合加職乃陞秘閣脩撰二年四  
月召爲秘書少監九月兼權中書舍人六和塔僧以鎮

潮爲功求內降給賜所置田產仍免科徭公奏二稅外加預買折帛正額外科借皆科也保正長身丁雜役皆徭也僧寺旣違法置田復移科徭於民柰何許之况自紹興二十二年脩塔之後潮果不齧岸乎御前置忠鏡忠武軍以浙西路鈐轄李師古兼統制帶御器械戚世明兼訓練援例請增給公執不可其命俱寢俄兼崇政殿說書三年四月除權刑部侍郎升侍講五月兼國子祭酒公言辟以止辟未聞縱有罪爲仁也今四方讞獄例擬貸死臣謂有司當守法人主察其可貸則貸之如

此則法伸乎下仁歸乎上矣上以爲然舊法宰執初除轉聽皆有給使減半其後太尉使相三少而上往往取旨視樞密使都官用例浸失法意公請自侍從而執政自執政而相則爲初除法當全與餘爲轉聽皆減其半遂爲定制上知公特立不避怨滋欲用之四年八月兼給事中江陵統制官率逢原縱部曲毆百姓守帥辛棄疾謂曲在軍人坐徙豫章公極論不可上曰朕治軍民一體逢原已削兩官降本軍副將矣康與之在紹興時以歌謔進後坐事長流廣南至是有與爲地刊除舊犯

還其資歷公封還勅黃上喜曰待遷擢卿其益盡心毋  
避忌十月落權字五年正月同知禮部貢舉御製原道  
辨尋易名三教論獨公與聞之六月進吏部右選侍郎  
兼同脩國史舊小使臣注令尉若監鎮兼烟火者驗老  
病而已公以其親民面令讀律且詰其大指不通者輒  
罷遣八月兼權尚書六年夏正除權吏部尚書公遇事  
啓請知無不言如論軍中強壯子弟及西北伉健之人  
不可輕聽離軍禁衛不以膂力進今率三年輒補外官  
用違所長宜留實三衙又欲酌紹興舊制命諸軍挽強

轉資稍示勸誘又請寃歸正僞冒裁減添差以寬州郡  
一曰奏堂白累萬餘言會舉行中外更迭之制公力請郡  
是冬除敷文閣直學士知泉州陞辭上諭曰凡有見悉  
奏來自南渡後泉爲台信建昌邵武四郡代輸銀二萬  
四千兩諸縣並緣苛歛預借公條便民事具言本末有  
司持之未下明年首爲民代輸一年且乞禁絕後日預  
借又蠲前歲秋苗之未輸者八年春汀賊沈師作過詔  
併勦其徒公請罪止渠魁赦其脅從仍許徒中相糺可  
使亡命解散不然數州挺亂是堅其附賊也宰相然公

言奏行之是冬沈師獨與死黨竄伏漳州山谷間距城百餘里州有左翼軍戍將蕭統領者卷甲赴之逮夜力疲搏賊不勝死焉閩中大震漕檄左翼統制裴師武出兵師武置司左泉謂帥符未下不敢擅與公手書趣之曰事急矣有如帥責君可持吾書自解又取前得釋脅從之旨散榜以間其黨師武至漳群情頓安捕獲謀者十餘曹攢藏兵器謀刻日縱火爲賊內應微公先事從權趣師武行漳且屠矣太守劉立義郡人今左司卽中鄭公顯馳書謝公曰城邑獲全公之賜也終更提舉江

州太平興國宮十三年秋起知建寧府十四年復提舉  
南京鴻慶宮自公爲卽首侍壽康於王邸多所宏益其  
後間謁東宮必款語移時嘗用家人禮許見今上及公  
主親取寶器酌酒飲公受禫之初與宮僚一等推恩紹  
熙元年加寶文閣直學士起知明州示將復用遽以祠  
歸四年起進龍圖閣直學士明年請老進本閣學士致  
仕皆非常典也慶元十一月甲申以疾不起享年  
七十三積官宣奉大夫爵新安郡開國公食邑二千一  
百戶食實封一百戶贈特進公自宦遊去鄉里樂吳興

溪山之勝而卜居焉晚得安吉縣梅谿鄉邱閣山規營  
坐域未成而卒淑人陳氏公母之從兄女生百日值方  
臘亂父母攜匿谷中祝曰兒若貴勿啼自是悄然既長  
歸公事舅姑以孝聞生諸子躬自鞠育公嗜書未嘗省  
家事實祭孔時淑人力也年七十六遭公喪謂諸子曰  
吾得從而父足矣病不服藥後公四十七日安然而逝  
遂合葬焉二年四月辛酉也四男準朝散郎新通判太  
平州本阜世阜朝奉郎知上元縣覃宣教郎新浙西茶  
鹽司幹辦公事三女長適承直郎監行在文思院都門



鄭汝止次適奉議郎新知湖州武康縣丁大聲季蚤亡  
孫三人端復登仕郎端節端履以遺澤補官女三人公  
有文集若干卷別著禹貢論五十二篇辨江河淮濟漢  
潏水黑水甚詳凡諸儒捨經泥傳注失禹本指者一皆  
正之又爲山川地理圖端明殿學士汪公應辰博洽重  
許可讀之大歎服謂不可及公在講筵遂以進御天語  
嘉獎今行於世別有演繁露六卷攷古編易老通言易  
原雍錄四書各十卷北邊備對六卷書譜二十卷取五  
十八篇互相發明篇爲一論扶隱正譌尤有功於學者

嗚呼若公可謂博學篤志者矣銘曰

浩浩萬古孰知其津擾擾萬生孰致其身偉歟程公絕  
類離倫氣以直養業以勤精士之指南國之寶臣其在  
兩葉曷言復君使於四方仁心芘民胡不弼諧迄其經  
綸歸而著書極道之真既沒言立庶幾不泯自歎而湖  
肇自於今有式新阡尚考斯銘

朝奉大夫致仕李君

迎墓表

二  
周必大

河陽濟元多名族顯宦張氏李氏實相甲乙通婚姻南  
渡後祖母秦國張夫人每與李氏子弟篤叙親好予於

其間致愛兩人曰隨字可大廉介謹飭治縣有聲而其族弟諱迎字彥將行安節和恬於進取予尤重之可大沒已五十餘禩矣彥將下世亦二紀念之不忘也彥將之子數求予表先墓乃追紀聞見而考信行狀之說如左李氏胄出唐宗室汜水王本朝有諱感者以儒學起家至君曾祖章繼擢進士第以太常少卿致仕贈少師祖百朋中奉大夫致仕贈少傅父弼儒右中奉大夫直祕閣致仕贈少師妣姚氏曹氏趙氏秦魏楚國夫人君姚出也欽宗登極祕閣爲兩浙轉運副使君以捧表恩

補將仕郎調婺州都稅院發運使檄應辦王德軍錢糧  
改從仕郎故相趙忠簡公鎮豫章辟知靖安縣又從金  
陵行宮留守爲準備差遣歷温州軍州推官程邁梁汝  
嘉閩丘斯號吏師皆以侍從出守事多委君程嘗歲暮  
遣閩帥留至正月以薦章授乃解印有錄事叅軍老而  
貪已授代爲嬖吏所持君械繫掠治吏叩頭服罪同僚  
谷美舉貞應格改右宣教郎知臨安府錢塘縣歲旱留  
運河水溉民田會金國使至漕臣論君撤壩通舟君固  
請留其半漕怒捃摭無所得至用前政陳炳科皇城磚

事効君失政坐是罷起知湖州歸安縣外艱不赴知婺  
州金華縣提轄行在雜買務雜賣場郊恩賜銀緋求外  
補充福建安撫司主管機宜文字再爲提點鑄錢司主  
管文字軋道初代還時相洪文惠公與君有舊君資歷  
當爲二千石總得通判臨安府朝市浩穰非所好也乞  
易明州浙東總管曾覲以代耶恩數薦進人才其門如  
市知君京洛故家屈意願交尋召還人謂必有裏言君  
適秩滿卽袖牒從太守乞保明奉祠竟去管台州崇道  
觀歸寓湖州新市鎮蕭寺中手抄聖賢治心養性之要

時時賦詩自樂類成百篇舊藏畫像惟肖淳熙改元之  
六月自題贊百餘言其畧曰三仕三已應緣而止一丘  
一壑倦游而歸耳目鼻口盡史或得彷彿至於超然物  
外彼亦安知其端倪也耶俄遇微疾沐浴端坐而逝是  
歲九月丁未也予始悟自贊之意云享年七十有二明  
年正月己酉葬湖州烏程縣三碑鄉金山原秘閣墓之  
左以子升朝累贈中奉大夫妻令人周氏永嘉名士周  
行已恭叔之女恭叔官京師與祕閣善君未弱冠風度  
凝遠能文辭善談論故以女歸之後君十一年八十三

而卒耐君以葬四子結故朝奉大夫尚書度支員外郎  
總領四川財賦軍馬錢糧綜早世級故從政郎平江府  
司法叅軍綺今爲從政郎新泰州如臯縣令女二人宣  
教郎王光達朝散大夫新知真州寧張顏其婿也孫男  
七人大成新池州青陽縣尉大雅新寧國府太平縣主  
簿大均新高郵軍興化縣尉皆建功卽次大有大鵠大  
亮大倫孫女七人初祕閣之沒君二子當受遺澤其一  
遜弟之子世服其義君潔靜通敏有可用之才知己方  
在朝輒違而去之長子持節近甸人以爲榮君視之泊

如也惟榮辱得喪未嘗屑屑曾次故其終神識湛然可  
以窺所蘊矣今諸子惟如臯在卽求表君之墓者行狀  
蓋真州之文也慶元三年閏六月日具位周某述

祭芮國器祭酒文

周必大

維乾道八年歲次壬辰十二月乙巳朔九日癸丑具位  
周某謹遣人以清酌庶羞致祭於故右文殿修撰芮公  
之靈惟公之德渾厚正直惟公之才恢闔俊軼克孝且  
友其秉也天勇於蹈義則繇學然發爲詞章登唐近漢  
著於議論弗蹈中訕仕有險夷道無磷淄從容周行譽



問孔歸君子所恃而亦不比小人所畏而亦不忌帝庸  
深知決用靡疑云誰不然遽撼奪之太學于英毀譽靡  
出聞公之喪隕涕如一况我劓介交分尤深初爲王官  
同事司成遷正麟閣我畏公先傳之之慶驗其年執  
筆太史分察南臺凡我所歷公必繼來我之投閑僻在  
螺水公使嶺表過我蕭寺公涉全節我起持麾不會于  
閩而遇於畿公長國子我塵公令官曹俱清班綴愈近  
湖山擇勝尊酒命文如何俯仰其迹俱陳於瘁之悲曰  
惟衆共死生契闊其如予慟蒼黃去國莫莫生芻有槩

於中身楚心吳夢爲斯文以酬靈几寤而驚咤絕三四  
語昔焉氣合今固神交公惟不忘忍吐斯肴

祭劉汝一 廣 諫議文

周必大

維淳熙五年歲次戊戌二月丙寅朔十日乙亥具官某  
謹遣人以清酌庶羞之奠致祭于故諫議殿撰劉公之  
靈惟公學博而醇氣和而剛文揜衆俊行高一鄉石林  
之葉龍溪之汪謂公晁董交飛薦章追其仕矣或抑或  
揚晚登諫垣聲譽孔彰龍飛在天進佩水蒼主聖臣直  
疏盈皂囊雖分竹符宸眷未忘論議之華儒林以光于

漳于葵蘇枯弱強上欲用公公足弗良八表甫開奄兮  
淪忘位非不顯年非不長有藎莫施寧隱且殤士夫太  
息我涕用滂念昔瀛洲公校鈔黃直則並舍歸則連墻  
今焉百里莫莫公喪無窮之恨寓此一觴

祭莫子齊舍人文

周必大

維淳熙五年歲次戊戌十二月庚寅朔四日癸巳翰林  
學士中奉大夫知制誥兼侍讀兼太子詹事兼脩國史  
管城縣開國子食邑三百戶賜紫金魚袋周某等謹以  
清酌蔬食之奠敢昭告于近故直院中書舍人莫公之

靈惟公行飭文敏內剛外和名重月評秀發儒科人爲  
王官退食委蛇恂恂寡言鮮或譏訶見義則爲勇敢橫  
戈介卿劍監禁掖鑿坡再至三至人嘆蹉跎乃心怡然  
守道無頗往禪王藩譽問孔多於溫於泉中和可歌召  
登從班進賢義義匱薄之故嬰此微疴賜告於家禮殊  
紫蒨禺中草制文尚傾河甫息在牀遽隨逝波縉紳駭  
聞爭以爲訛謂仁必壽豈知其他矧伊雙鬢亦云未皓  
奄忽如斯天理則那吾徒爲僚方賴切磋脯醢之莫胡  
爲駢羅醢觴再拜有淚滂沱哀哉尚饗

蔡同年程泰之尚書文

周必大

惟公鄰幾之學貫道之文絕類之才濟世之心出使典  
州功利在人六部兩禁謀猷畢陳時非不遇志非不伸  
未相而歸猶鬱經綸乃發所蘊考評古今著書立言手  
筆不停以覺後生以追先民謂且百年爲儒主盟菴其  
已矣聞者失聲矧鄙不肖自初同升成均祕府史闈邁  
莫步武日接交遊日親一別十年悵馬此情豈思話言  
夜夢儀形孰云計來遂隔幽明寓詞千里有淚霑巾  
吳興藝文補卷之十九